

## 01

### 锦瑟

锦瑟无端五十弦，一弦一柱思华年。  
庄生晓梦迷蝴蝶，望帝春心托杜鹃。  
沧海月明珠有泪，蓝田日暖玉生烟。  
此情可待成追忆，只是当时已惘然。

## 02

### 重过圣女祠

白石岩扉碧藓滋，上清沦谪得归迟。  
一春梦雨常飘瓦，尽日灵风不满旗。  
萼绿华来无定所，杜兰香去未移时。  
玉郎会此通仙籍，忆向天阶问紫芝。

## 03

### 寄罗劭兴

棠棣黄花发，忘忧碧叶齐。  
人闲微病酒，燕重远兼泥。  
混沌何由凿，青冥未有梯。  
高阳旧徒侣，时复一相携。

## 04

### 崔处士

真人塞其内，夫子入于机。  
未肯投竿起，惟欢负米归。  
雪中东郭履，堂上老莱衣。

读遍先贤传，如君事者稀。

## 05

### 霜月

初闻征雁已无蝉，百尺楼高水接天。  
青女素娥俱耐冷，月中霜里斗婵娟。

## 06

### 商於

商于朝雨霁，归路有秋光。  
背坞猿收果，投岩麝退香。  
建瓴真得势，横戟岂能当。  
割地张仪诈，谋身绮季长。  
清渠州外月，黄叶庙前霜。  
今日看云意，依依入帝乡。